


# Gränzgänger



## FASNACHT 2023

### D Gränzgänger styge in d Hoose und faare taggtvoll ab mit ihrem Toleranz-Expräss.

Mit 75 + (jetz muesch guet loose!),  
styge d Gränzgänger in d Schwingerhoose!  
Si geen in Ring gege die gaischstig Arthroose,  
und staatlig Reglementier-Nuroose;  
gege s Säägmääl in de Kepf,  
und die in de Hirni offene Knepf!  
D Wält isch voll Stuurheit und Intoleranz  
d Konsequänz drvo isch zvyl Arroganz!!  
Schluss mit däm taggtlose Affedanz!!

Darf me das no? Was isch no erlaubt?  
Was darf me nimm? Worum iberhaupt?  
So Frooge vermyyse uns fascht jeede Daag!  
Darf-i no ässe was I gärn mag??  
Hesch gärn Fleisch, produziersch CO2!  
Mach alter-naiv e vegan Spiegelei!  
Vorusse schnuufe schadet de Baim!  
Wotsch s Klima schitze, blibsch besser dehaim!

Sogar bi dr Gender-Haip waisch nimm gnau,  
bin- i e Maa oder bin -i e Frau,  
oder illicht sogar s Ander au??

E gluschtige Morekopf kaufe und ässe?  
Das kasch – wie au Maitlibai – ganz schnäll vergässe!!  
(Nur bi de Gränzgänger, statt Orange, Banane,  
griegsch e grosse und guete, muesch aber nooch aane!)  
E Russezopf schmeggt jetz nur no fuul und suur.  
e Jägerschnitzel isch Totschlag pur!

Dr Winnetou isch als Vorbild kabutt:  
en edle Charakter in dr ganz falsche Huut!  
Au bim Kinderfrind-Lokifierer Jim Knopf,  
zellt laider nur no d Farb vo sym Kopf.  
Was isch erlaubt, was darf me denn no?  
Wo blibt dr gsundi Menscheverstand, wo?

Wär alles hett Yfluss in dr Wält?  
Politiker oder nur Lyt mit vyl Gäld?  
Populische – Journalische?  
Demonschtante, Polizische?  
Kläbrigi Klimafetischische?  
Die, wo nyt versteen, und sich wänn brischte,  
anstatt vor ihrer Huustür z mischte!?

Oder sinns jetz ney d Rassischte,  
wo Mieh hänn im Lääbe mit em Guete,  
und immer ebbis Schlächts vermuete??  
Si verdächtige Tradizione,  
mit krumm-dumme Assoziazone,  
wänn alles und jedes hinterfrooge,  
egal, ob s voor isch, oder glooge.

«Sag mir bitte, woher Du bischt» –  
bevor d Antwort hesch, bisch scho Rassischt !  
Und die hailige 3 Keenig?  
Vo ihrer Huutfarb redt me weenig !  
Derfe die im Kulturguet bliibe

Oder muess me au d Wienachtsgschicht ney schriibe?

Määrlí\*\* sin ungsund, für miich und Diich!  
Si vergelschtere d Kinder, fascht wiene Sych:  
sin sexistisch, rassistisch, royalistisch, brutal,  
kapitalistisch, kannibalistisch, – bref: unsozial.  
Isch s Schnewittli nit aifach e Tatort-Lyych?  
Dängge alli Zwärgli politisch glych?

Märlí vorlääse – das darf au nimm sy!

Kai Wunder hän die Glainschte scho s Handy drby!

Will me uns jetz au no d Fasnacht vermyyse?  
Als hätte mr nit scho en Usswaal an Kriise  
Mir froogen ys drum uffs ney jedes Joor:  
Isch unseri Fasnacht au in Gfoor?  
Derfe mir no im Goschtym uff d Gass?

Isch intrigiere no erlaubt und e Spass,

oder kulturerblig nur «Wünsch Dir was?»

Waggis, Harlekin, Blätzlibajass,  
die «she too»-fraidigi alti Dante,  
sin lang integrierti Traditons-Migrante!  
Au wenn si nit alli drummle und pfiffe!

Nur e Dummpeter ka das nit begriffe!

Wird au dr Cortège kalt abgsetzt?

und dur e Taktfaarplan ersetzt?

Derfe mir s näggscbt Joor im Cortège faare,

mit ene no reglementiertere Kaare??

Dä schigg Kultuur/Toleranz-Expräss

git Gegestyr gege die Exzäss.

Was darf me no? Worum das TämTäm?

Wäge wäm, wage wäm, wäge wäm???

**«Udedruff steen so Määrlí, ganz stark komprimiert,  
damit wäge däm Zeedel kai Rassischt konstipiert!»**

---

**Kultur-Määrlí, gsträält.**

*Dangg em Hänsel und Gretel ihrem Knuschper-Konzäpt,  
hett die beesi Diät-Häx niit iberläbt!!*

*Sin Max und Moritz nur gwaltfrei erzooge,*

*oder an ere Demo z.frieh abbooge?*

*D Schuld hänn d Leerer und glaar d Psychiater!*

*Und schnäll simmer scho bim Gstifelte Kater:*

*Das isch e Verhunzig vo dr Katz!!*

*Är suecht jo nur e «Plätzli gsuecht»-Platz!*

*Dr Froschkeenig: splitternass, kurzsichtig:*

*maint: «e Frau isch fir my Karriere wichtig!»*

**Rotkäppli und dr Wolf. – aber dä isch doch gschiützt!**

**Hätt e Demo firs Tierwool villicht ebbis gnüützt?**

**Dr Hans im Glück: e Spekulant,**

**tuscht luuschi War mit dr freye Hand.**

**Dr Struwwelpeter ka nimm schlöße zNacht:**

**In Lönde het ain sy Frisuur noochegmacht!**

**Drby gäbs vo Johnson & Johnson so Sprey,**

**to keep O R D E R on the top of the brain all day!**

**Aschenputtel: Sozialfall! frustriert!**

**Dr Prinz: Abu Bin Ruggedi-guuh – kuum integriert,**

**ihri missgünstig Schwester orthopädisch frisiert,**

**mit ON Schue vom Rotscher wär das nit bassiert**

**Hann Eych die Steno-Määrlí paggt?**

**Fir d Gränzgänger isch die Fasnacht intakt – im Taggt!**

---

Vom Määntig znacht bis am Mittwuch demoorge kasch uff em  
Minschterplatz und em Kasärnen-Areal d'Ladärne-, d'Waagen-  
und Requisiten-Uustellig go aaluege!

«Wotsch ässe und dringge wo d Ambiance frappant syg:

**Kumm in Gränzgänger-Käller an dr Theaterstrooss 20!»**

[www.graenzgaenger.ch](http://www.graenzgaenger.ch)

---

Drugg: Druggerey Dietrich AG, Basel